

յաստան եւ Գերմանիա) վերնադրով մի գլըր-
քոյկ, որ լոյս է տեսել պատերազմի օրերին:

Ըստ երեւոյթին Դ-ը Ռոթ Հայագիտու-
թիւնն է ընտրել իր ապագայ ուսումնասիրու-
թիւնները յատուկ մարզ:

Դեռ մի տարի առաջ ինձ գրած մի նամա-
կում նա պարզում էր իրեն առաջադրած նպա-
տակը՝ հիմնել մի այնպիսի գիտական հանդէս,
որ իր շուրջը կենտրոնացնէր ինչպէս եւրոպա-
ցի, այնպէս նաեւ Հայ ուսումնասիրողներին,
եւ որը կոչուած լինէր շօշափելու Հայագիտու-
թեան բոլոր ճիւղերը անխտիր: Իր այդ նա-
խագիծն է ահա, որ այժմ գործադրութեան է
գրւում:

Հայկականի Հանդէսի յառաջարանում
գիտնական խմբագիրը ասում է.

«Հայագիտական ուսումնասիրութիւնները
Գերմանիայում ունեցել են իւրայատուկ ճա-
կատագիր: Նրանք զուրկ են եղել մի կենտրո-
նական օրգանից, որ նրանց յենարան հանդի-
սանար նպատակորոշ աշխատանքների համար:
Եթէ այս կամ այն դէպքում փորձ է արուել
այդ ուղղութեամբ, ապա նա վերջ է գտել ող-
բերգական պատահականութեամբ: Դրա պատ-
ճառը մասամբ այն է, որ Հայագիտութիւնը
մշակուել է ի միջի այլոց միայն, պատահա-
կանօրէն: Եւ սակայն հայերէնը սկսում է տա-
կաւ աւելի մեծ նշանակութիւն ստանալ Առա-
ջաւոր Արեւելքի — մանաւանդ լեզուապատմա-
կան եւ պատմական մարզի մէջ: Այս հանդէսի
խմբագիրը շատոնց ջանագիր է եղած՝ հիմնե-
լու մի այնպիսի գիտական օրգան, որ ընդգլըր-
կէր Հայկական ամէն տեսակ ուսումնասիրու-
թիւններ, որ հայերի համար եւս դառնար մի
տեսակ յենարան ու հաւաքատեղի՝ նպաստե-
լու Առաջաւոր Ասիայի ուսումնասիրութեան
խորացմանը»:

«Արմենիաֆա» Հանդէսը պիտի հիւրընկալէ
ամէն տեսակ աշխատութիւններ, որոնք նախ
եւ առաջ Հայ լեզուագիտութեան, քաղաքական
եւ եկեղեցական պատմութեան, ազգագրու-
թեան եւ արուեստի պատմութեան կը վերաբե-
րին: Նրա էջերը բաց են նաեւ՝ այնչա՛փ կա-
րեւոր բարբառագիտութեան, արձանագրու-
թեանց, մանր բնագիրների հրատարակութեան
համար: Բայց այս հանդէսը չի սահմանափակ-
ուելու դրանով: Հայերէնը եւ Հայագիտութիւ-

նը չէ՞ որ սերտ կապ ունին հարեւան շրջան-
ների հետ, որոնք եւս կարող են լոյս սփռել
հայերէնի վրայ, եւ ընդհակառակը՝ հայերէ-
նը՝ դրանց վրայ: Այդպիսով սպասելի է, որ
դեռ եւս շատ մութ կէտեր լուսարանուին լեզ-
ուական եւ պատմական մարզերում: Ուրեմն,
մեր հանդէսը իր սիւնակները բաց է անում
նաեւ այդ՝ հարեւան մարզերի առաջ, որչա-
փով նրանք կապակցութեան մէջ կը դրուին
Հայագիտութեան հետ: Այդպիսիք են՝ հեթի-
թական, թոխարական, բասկեան, փոլագա-
կան, էտրուսկեան եւ կովկասեան լեզուների
ուսումնասիրութիւնները մի կողմից, միւս
կողմից էլ՝ Հայ ժողովուրդի մշակոյթային եւ
պատմական աղբյւրները իր դրացի ժողովուրդ-
ների հետ, որոնց կողքին նա ապրել է, եւ կամ
որոնք տիրել են նրան»:

Armeniaca Հանդէսի առաջին գիրքը
(Լայպցիգ, 1926) ունի 132 էջ, հետեւեալ բո-
վանդակութեամբ. 1. Կարլ Ռոթ՝ Հայագի-
տութիւնը եւ նրա արդի խնդիրները, 2. Իօզէֆ
Ստրփիգովսկի՝ Հայաստան ու Եւրոպայի նա-
խահռոմէական փայտաչէն ճարտարապետու-
թիւնը, 3. Իւհաննէս Շփիգէր՝ Գեղարուեստի
եւ բնութեան փաստեր (քարտէսով միասին),
4. Մատենախօսական եւ մատենադրական նօ-
թեր:

* * *

Կարլ Ռոթի յօդուածը՝ «Հայագիտութիւնը
եւ նրա արդի խնդիրները», վերարտադրութիւն
է հեղինակի մի գիտական բանախօսութեան,
որ նա կարդացել է Բերլինում 1923 թուակա-
նին, Գերման Արեւելագէտների համագումարի-
նին:

«Հայկական հարց գոյութիւն ունի, — ըս-
կում է Ռոթ իր բանախօսութեան ուսումնա-
սիրութիւնը, — ոչ միայն քաղաքական, այլ եւ
գիտական մարզում, — առաջինի չափ հին ու
դժուարին: Եթէ Հայ-քաղաքական հարցը տա-
կաւին գրեթէ չէ լուծուած, եթէ աշխարհը եր-
ջանկացնող հանճարեղ մարդիկ իրենց անկա-
րողութիւնն են հանդէս բերել այդտեղ, ինչ-
պէս եւ ամենուր, դրա հակառակ՝ գիտութիւնը
մատնանշել կարող է իրապէ՛ս կատարուած
գործեր, որոնք աշխատել են մի անսովոր սրա-
մտութեամբ լոյս սփռել մթին խնդիրների վը-
րայ»: